

Friûl di Jevât

PAR CURE DA LA SOCIETÂT FILOLOGJICHE FURLANE

Vie Ascoli, 1, Guriza - tel./fax 0481533849 - gorizia@filologicafriulana.it - www.filologicafriulana.it

No mancjaran lis colaborazions cun altris istituzions culturâls

Ca di cualchi zornade, inte Place da la Transalpina / Trg Evrope, si varà la scree da la Capitâl Europeane de Culture 2025, cuant che Gnova Guriza e Guriza a saran tal centri da la atenzion no dome a nivel sloven e talian, ma par dut il vecjo continent.

La Filologjiche no podeve mancjà di rimarcà la presince da la comunitât furlane in cheste ocasion e si à vût programât dute une schirie di iniziativis dilunc dal an, promovudis da la Societât e in cunvigne cun altris realtâts culturâls, publicazions e visitis a Cjasa Ascoli.

Za tai prins mês dal an si previôt di organizâ incuintris culturât inte sede di Guriza: tra chescj, la presentazion dal portâl techefriulane.it e, in particolâr, da la sezion multimedial "Le lingue di Gorizia" che e ten drenti diversis regjstrazions di oparis leterariis dal Gurizan (Celso Macor, Renato Jacumin, Gjoanin Minut, Delchi Tirel, Franco De Gironcoli e Gianluca Franco) che si puedin scoltâ dal web in maniere libere e sore nuie; al è chest un mût gnûf par promovi il nestri patrimoni leterari.

Un dai protagoniscj da lis propuestis pe Capitâl europeane de Culture al sarà Celso Macor, che o vin za tacât a ricuardâ viers la fin dal an passât: tal 2025 a colin i cent agns da la nassite dal poete e inteletuâl di Viarsa. In Març, propit a Romans dal Lusinc, si varà la scree di une mostre da lis



*I ricuarts di Celso Macor,
Anna Bombig,
Renato Jacumin
dongje di cunvignis
e incuintris vie pal an*

oparis di Dario Delpin dedicadis a lis poesiis di Macor. La stesse mostre e sarà

esponude in Palaç Mantica a Udin pe "Setemane de culture furlane" e a Guriza inte sierade.

Simpri pe "Setemane", che chest an si fasarà dai 8 ai 18 di Mai, a son in program diversis iniziativis: tra chestis il ricuart di Anna Bombig, a Fara, inte suaze dal progjet "Cross Culture"; dongje, une valorizazion da lis ricetis de publicazion "Gustâ Gurizan" di Roberto Zottar. Simpri drenti dal progjet "Cross Culture", jenfri i mês di Jugn e di Lui, a Aquilee si varà un ricuart di Renato Jacumin

cuntune cjaminade che e tacarà di Munistîr e, traviersant il puart fluviâl, e rivarà in Basiliche cun leturis, cjants e intervencs in ricuart dal inteletuâl. No mancjara la atenzion pal mont da la scuele furlane: Docuscuele, il Centri regionâl di documentazion, ricercje e sperimentazion didattiche da la Societât, al inmanearà a Guriza "Scuele di Avost", il tradizional moment di formazion pai docents di dut il Friûl a la scuvierte de citât e dal teritori.

In sierade l'apontament plui impuartant al sarà, simpri a Guriza dai 20 ai 22 di Novembar, il IX "Colloquium Retoromanistich". Al è chest il plui impuartant incuintri scientific e culturâl di nivel internazional pai studis di lenghistiche, storie e culture dai Grisons, da la Ladinie Dolomitane e dal Friûl. Si daran dongje in cunvigne cetancj ricercjadôrs che a partegnin a la comunitât lenghistiche romanze, definide di Graziadio Isaia Ascoli cu la opare dai Saçs Ladins za tal 1873.

No mancjaran lis colaborazions cun altris istituzions culturâls che a organizaran iniziativis tal Gurizan. O vin za fevelât da la colaborazion cul progjet "Cross culture", promovût de Union tra lis associazions culturâls di Gnova Guriza, ma e je ancje la Deputazion di storie patrie pal Friul che, dai 16 ai 17 di Otubar in parie cu l'Istitut di Studis storicis de Academie Slovene di Siencis e Letaris, e tignarà la cunvigne "Comunicazione, scambi e incontri nel Goriziano" par rimarcâ, ancjemò une volte, la storie comun dal Gurizan da la Ete di mieç in di vuê.

Presentât il volum inte sede de "Accademia della Crusca"



I 150 agns dai "Saggi ladini" e la ereditât dal pinsîr di Ascoli

"Noaltris che o difindin la lenghe taliane o difindin ancje lis lenghis di minorance": cun chestis peraulis il professôr Paolo D'Achille, president de "Accademia della Crusca", al à dât il benvignût a la Societât Filologjiche Furlane, che ai 22

di Zenâr e à vût l'onôr di jessi ospitade a Florence, inte sede de Academie, par presentâ la racuelte dai ats de cunvigne "I 150 anni dei Saggi ladini tra storia e attualità". La cunvigne si jere davuelte tal Novembar dal 2023 par ricuardâ i 150 agns de jessude dai innomenâts saçs di

Graziadio Isaia Ascoli che tal 1873 a vierzevin la riviste "Archivio Glottologico Italiano" fondade dal stes lenghist gurizan: pe prime volte, a traviers dal esam de fonetiche des varietâts alpinis, e vignive ricognossude la identitât de lenghe furlane e di chês altris fevelis ladinis. "I Saggi ladini" - al à dit il dean de Filologjiche Federico Vicario, che al à viert e al à coordinât la cunvigne di Florence - a son une opare di impuartance fundamentâl pe definizion dai caratars lenghistics dal furlan, de sô identitât e de sô posizion intal mont neolatin.

La Societât Filologjiche Furlane e je intitulade a Ascoli e e puarte indevant, di cuant che e je stade fondade tal 1919, l'impegn pal studi e pe valorizazion dal complès des varietâts lenghisticis de nestre region". Al à fevelât Angelo Variano de Universitât dal Friûl par spiegâ la struture dai "Saggi ladini", biel che Giampaolo Salvi al è intervignût su la cuistion ladine.

Il compit di presentâ il volum i è tocjât a Carla Marcato, curadore insiemit cun Vicario. I contribûts cjapâts drenti dal volum a son ducj di specialiscj cualificâts, studiôs di prin plan di lenghistiche e dialetologjie taliane; a presentin i contignûts e la fortune de opare, a fevelin di cemût che si è disvilupade la materie e de attualitât dal pinsîr di Ascoli pai studis lenghistics modernis.

Agjende

■ Pai zovins

Servizi Civîl Universâl

Ancje la Societât Filologjiche Furlane e çape part al progjet dal Servizi Civîl Universâl, la propueste pai zovins tra i 18 e 28 agns.

Il Servizi Civîl al è une oportunitât impuartante che ur ofris ai zovins un percors di formazion e di introduzion al lavôr e ur permet di svicinâsi al mont professionâl e di disvilupâ lis lôr competencis drenti di un ambient sigûr e ospital.

Il servizi al dure 12 mês par un total di 1145 oris, dividudis in 25 oris flessibilis su 5 dis par setemane; ai volontaris sur spiete un rimbors di sù par jù € 507 al mês.

Cui progjets di Servizi Civîl Universâl si fasin ativitâts che a àn obietifs di disvilup sostignibil e, in particolâr, di sostegn dai bens dal teritori e de comunitât local. Il progjet inviât da la Societât Filologjiche Furlane si clame ProLenghe 2024 (codiç dal progjet: PTXSU0037124011977NXTX) e al à par obietif di lavôr la promozion e la tutele de lenghe e de culture furlanis. La sede dal servizi e je a Udin inte sede de Societât in vie Manin 18.

Si pues fâs domande dome online, su la plateforme DOL (Domanda On Line: <https://domandaonline.serviziocivile.it/>), che indicazions si cjatin sul sit dal Dipartiment pes Politichis Zovanîls e il Servizi Civîl Universâl: www.politichegiovani.gov.it Cun di plui, par aprofondiments, si pues çjalâ il sit dal Infopoint regionâl pal Servizi Civîl: www.infoserviziocivile.it